



Komunikadu Imprensa
Tribunál Judisiál Primeira Instánsia Dili
07 Agostu 2024

**JSMP konsidera absolvisaun ba arguidu LRTM iha krime arma proibida la
reflete faktu, la justu no viola prinsípiu sentensa iha Kódigu Penál**

Iha 30 Jullu 2024, Tribunál Judisiál Primeira Instánsia Dili (TJPID), prezide leitura akordaun no absolve arguidu LRTM hosi krime arma proibida ne'ebé inputa ba arguidu.

Absolvisaun ne'e, iha prinsípiu, mínimu liu, juis bazeia ba fundamentu rua; 1) tribunál konsidera arguidu esperiénsia nu'udar eis Prokuradór-Jerál Repúblika, eis Komisáriu Polísia Nasionál Timor-Leste (PNTL), eis Ministru Interior, ect, tribunál fiar katak arguidu sei laiha intensaun atu uza sala arma proibida ne'e, no 2) aktu rai arma proibida ne'e la konstitui perigu ka la ameasa ema seluk nia vida.

“Desizaun ne'e la tuir lei tanba arguidu klaramente viola Artigu 211 KP ho redasaun foun tuir Lei Nú. 5/2017 kona-ba arma sira proibida (inklui arma brankas). Artigu refere la prevee katak nu'udar eis-Komisáriu PNTL ka titulár kargu públiku anterior, sira iha direitu pose ba arma no pose ne'e sei la konsititui nu'udar krime bainhira la kauza perigu ema nia vida. Fundamentasaun Tribunál nian fora hosi lójika justisa, la tuir lei no laiha validade jurídika”, dehan Sra. Ana Paula Marçal, Diretora Ezekutiva JSMP.

JSMP fiar Ministériu Públiku sei halo rekursu kontra desizaun ne'e tanba absolvisaun arguidu hosi kazu arma proibida ne'e la'os desizaun ne'ebé adekuada no justu tanba hakanek sentimentu justisa públiku no viola prinsípiu jerál sentensa iha Kódigu Penál” ne'ebé juis sira iha responsabilidade moral no institusionál atu defende.

Iha prinsípiu jerál KP Timor-Leste nian estabelese kondisaun ka rekizitu sira báziku nu'udar regra ba esesaun (*pengecualian*) ba kondenasau ho razaun:

- 1) inimputabilidade tanba idade, no
- 2) inimputabilidade tanba anomalia psíkika (moras mentál)¹.

Alende ne'e, iha KP mós define sirkunstánsia iha norma lei penál nian ne'ebé nu'udar fundamentu ba kauza hodi esklui/hasai ka halakon ilisitude no kulpa, tanba;

- 1) eskluzaun ba ilisitude;
- 2) lejitimidade defeza;
- 3) estadu ho nesesidade justifikante; no
- 4) konflitu iha dever².

¹ Artigu 20 no artigu 21 Kódigu Penál.

² Artigu 43-36 Kodigu Penal no 48-50 Kodigu Penál no mós artigu 283 Kódigu Prosesu Penál.

Ne'e katak lei penal permite ajente ka arguidu ruma bele hetan esesaun ka esklui hosi pena ka kastigu mezmu provadu komete krime, bainhira priense prinsípiu jerál sira no sirkunstánsia sira ne'ebé lei penal estabelese.

Prinsípiu no norma sira kona-ba sentensa tantu kondenatóriu no/ka absolvióriu ne'ebé lei penál estabelese atu asegura katak desizaun tribunál nian tenke ho fundamentu no bazeia ba lei no iha ninia rasiosíniu no lójika justisa nian. Desizaun tribunál tenke ho baze prova ne'ebé realiza ho objetividade ne'ebé prodús durante julgamentu produsaun ba prova iha tribunál.

Iha kazu ne'e, JSMP la hetan baze-fundamentu ne'ebé reflète nesesidade atu fó dalan ba tribunál hodi absolve arguidu. Tanba iha julgamentu arguidu rasik rekoñese integralmente faktu sira ne'ebé imputa ba arguidu no tribunál mós admite katak arma proibida sira iha ne'e iha hela arguidu ninia pose, tanba ne'e tribunál decide atu a favor ba Estadu. Ne'e signífika faktu ne'ebé Ministériu Públiku akuza kontra arguidu provadu, nu'udar aktu ne'ebé kontitui krime ka aktu ilegál tanba viola klaramante artigu 211 KP kona-ba arma proibida. Faktu ne'e tenke observa no avalia independentemente hosi sirkunstánsia seluk kona-ba fundamentu tribunál katak arma hirak ne'e la fó perigu ka la hamosu ameasa ba ema nia vida.

Iha parte seluk, JSMP observa katak iha krime ho natureza hanesan ne'ebé envolve sidadaun baibain (ema ordináriu sira), iha tendénsia tribunál kuaze kondena arguidu sira, enkuantu iha kazu ne'e tribunál absolve arguidu mézmuke iha prova hatudu katak arguidu rai subar arma proibida iha nia rezidénsia.

Hosi kazu ne'ebé mak JSMP rejista entre tinan 2016 -2019, mínimu liu, iha kazu haat (4) mak tribunál kondena ho pena oioin. Kazu sira ne'e mak hanesan kazu ho Nú. Prosesu: 0049/18.BCSIC, tribunál kondena arguidu ho pena prizaun tinan 3 suspende ba tinan 3. Ba kazu ho Nú. Prosesu: 0152/16. OESIC, tribunál kondena arguidu ho pena prizaun tinan 2 suspende ba tinan 2, kazu ho Nú. Prosesu 0420/13 PDDIL, tribunál kondena arguidu ho pena prizaun tinan 1 suspende ba tinan 1 no kazu ho Nú. Prossu 0034/12 DISIC, tribunál kondena arguidu ho pena admoestasaun³.

JSMP observa katak Tribunál la halo esforsu másimu, la avalia no apresia ho apropiadu no rigór faktu ida-idak hosi akuzasaun prokuradór nian.

“JSMP konvensidu katak tuir loloos arguidu ba kazu ne'e laiha fatin atu hetan absolvisau total - mínimu liu arguidu hetan kondensaun simples ba detensaun (rai), uza ka rai arma fogu ho nia moldura penál to'o tinan 2 prizaun ka multa hanesan prevee iha provizaun alinea 3) Artigu 211 KP. Tanba iha faktu lubuk ida ne'ebé hatudu katak arguidu rai duni arma proibida (monisoins) iha nia rezidénsia”, afirma Sra. Ana Paula Marçal, Diretora Ezekutiva JSMP.

³Sumáriu Kazu JSMP; 1).Tribunál Distrital Baucau - Abril 2019: <https://jsmp.tl/wp-content/uploads/Sumariu-Kazu-Tribunal-Distrital-Baukau-Abril-2019.pdf>; 2). Tribunal Distrital Dili- Setembru 2018: https://jsmp.tl/wp-content/uploads/SumariuKazuTribunalDILI_Tetum-1.pdf; 3). Tribunal Distrital Oecusse – Outubro 2018: https://jsmp.tl/wp-content/uploads/SumariuKazuTribunalOEKUSI_TETUM-1.pdf; 4). Tribunal Distrital Dili – Maiu 2016: https://jsmp.tl/wpcontentuploads/2016/02/SumariuKazuTribunalDILI_Tetum.pdf.

JSMP entende katak hirak-ne'e iha valór probativu suficiente atu kondena arguidu tanba tuir lei arguidu tenke entrega kilat no monisoins sira ne'e iha momentu arguidu nia mandatu termina. Maibé pelukontráriu, arguidu kontinua rai iha nia rezidénsia. Piór liu mak bainhira autoridade polisial halo buska no apreensaun deskobre katak arguidu rai-subar sasan sira ne'e iha *plafond* leten, la'ós iha fatin nakloke no asesivel. Ida-ne'e hatudu indísiu katak arguidu iha intensaun atu apropria sasan ne'e no atu utiliza bainhira presiza.

Tanba ne'e, absolvisaun totál sein kondisaun ruma ba arguidu ba krime referidu sei loke espasu no jurisprudénsia iha prátika judisiáriu katak iha futuru ema sivíl seluk ne'ebé asume kargu importante sira iha instituisaun seguransa no defeza ka instituisaun relevante sira seluk iha dalan atu rai no/ka uza arma proibida hafoin sira nia mandatu termina. Tendénsia ne'e, iha poténsia boot atu fó risku ba comunidade sira nia seguransa no estabilidade nasionál bainhira ema ida-idak livre atu rai no uza arma hirak ne'e la tuir lei.

Atu hetan informasaun kompletu, favor kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Telefone: (+670) 33238883 | 77040735
Website: <https://jsmp.tl>
info@jsmp.tl